

BPR siasat kes rasuah

Yong ^{BH} 21/6/08
M/S 1+3

KUALA LUMPUR: Badan Pencegah Rasuah (BPR) semalam memulakan siasatan terhadap bekas Ketua Menteri Sabah, Datuk Yong Teck Lee berhubung dakwaan rasuah dan salah guna kuasa membabitkan wang lebih RM5 juta hasil keuntungan jualan saham syarikat milik kerajaan negeri itu.

Siasatan itu dibuat berikutan pendedahan bekas Pengarah Briskmark Enterprise Sdn Bhd, Datuk Wasli Mohd Said ketika pemeriksaan utama dalam perbicaraan kes terhadap bekas Menteri Pembangunan Tanah dan Koperasi, Tan Sri Kasitah Gadam, di Mahkamah Tinggi di sini, kelmarin.

Pengarah Siasatan BPR, Datuk Mohd Shukri Abdull, berkata siasatan pihaknya akan bertumpu kepada keterangan yang dikemukakan Wasli dalam prosiding kelmarin, berhubung arahan Yong supaya pembayaran lebih RM5 juta yang menjadi sebahagian keuntungan Lembaga Kemajuan Tanah Negeri Sabah (LKTNS) kepada ejen pilihannya.

"Berdasarkan affidavit, Wasli menyatakan Yong menerima wang. Keterangan itu adalah antara perkara utama yang perlu diteliti dengan terperinci.

"Kita akan panggil semua individu yang terbabit untuk membantu siasatan dan arahan juga dikeluarkan supaya siasatan segera dijalankan terhadap kes ini kerana ia membabitkan kepentingan awam dan negara," katanya.

Beliau berkata demikian kepada pemberita selepas majlis penutup kursus pegawai penyiasat kewangan bertauliah mengenai Akta Pengubahan Wang Haram (Amla) di Akademi Pencegahan Rasuah (Maca), di sini, semalam.

Dalam perbicaraan kelmarin, Wasli berkata kejadian itu berlaku ketika beliau menjadi Pengurus Besar LKTNS yang terbabit dengan cadangan pengambilalihan pengurusan 40 peratus saham dalam Sapi Plantation milik lembaga berkenaan.

Wasli memberitahu mahkamah, selepas beberapa kali

Setiap orang dapat RM500,000

DARI MUKA 1

bertemu Yong, beliau diarah membayar sebahagian keuntungan penjualan saham itu kepada ejen pilihannya.

Selain kepada Yong, katanya, beliau juga membayar wang tunai RM500,000 kepada setiap daripada lapan anggota lembaga pengarah Briskmark sebagai derma. Mereka ialah Datuk Salleh Otik, Datuk Ismail Jook, Abdul Kader Pateh, Laimun Laikim, Michael Emban, Talib Aning, John Liaw dan Catherine Yong.

Keterangan Wasli itu dibuat pada perbicaraan Kasitah, 60, yang didakwa menggunakan kedudukannya sebagai Pengerusi LKTNS untuk kepentingan peribadi dengan mengambil bahagian dalam membuat keputusan meluluskan cadangan penjualan 16.8 juta saham Sapi kepada Briskmark.

Mengenai siasatan yang dijalankan, Mohd Shukri berkata, BPR menjurus kepada dua aspek utama iaitu Seksyen 15 Akta Pencegah Rasuah 1997 berhubung salah guna kuasa dan perbuatan rasuah mengikut Seksyen 11a akta sama.

Seksyen 15 dan 11a akta berkenaan menyebut, jika bersabit kesalahan boleh dihukum penjara maksimum 20 tahun dan denda maksimum lima kali ganda jumlah suapan atau RM10,000, mengikut mana yang lebih tinggi.

Ditanya sama ada BPR akan turut menyasat pemberian RM500,000 sebagai derma kepada lapan anggota pengarah Briskmark, Mohd Shukri berkata, perkara itu juga akan diteliti bagi menentukan sama ada ia perlu disiasat berasingan atau bersama kes membabitkan Yong.

Sementara itu, Yong dalam sidang medianya di Kota Kinabalu semalam menyifatkan kenyataan BPR itu sebagai percubaan untuk menakutkannya.

"Saya hairan dengan suasana masa kenyataan itu dibuat. Saya rasa sasaran pertamanya ialah saya dan keduanya ini adalah amaran kepada yang lain. Ada perumpamaan menyebut 'sembelih ayam sebagai amaran kepada monyet-monyet', jadi saya ayam yang kena potong dan monyet-monyet lain jangan ikut.

"Kenyataan BPR itu nak buat orang takut dan ini tidak sihat untuk negara. Ini kes sejak 12 tahun lalu, mengapa sekarang baru ditimbulkan dan bukan minggu lalu," katanya.

Ditanya sama ada beliau akan memberi kerjasama kepada BPR jika diperlukan, Yong yang pernah menjadi Ketua Menteri Sabah pada 1996-1998 berkata, agensi itu pernah mengambil kenyataannya berhubung kes sama beberapa tahun lalu.

"Kalau ini satu ugutan supaya SAPP berkompromi dengan perjuangan kita, ia tidak baik dan saya bersedia menerima apa juga akibat demi perjuangan untuk rakyat dan Sabah.

"Sekiranya saya melakukan kesalahan, kalau ditangkap, kalau dihadapkan ke mahkamah dan kalau dipenjara, apa boleh buat tetapi jangan gunakan ini sebagai ugutan supaya perjuangan politik kami terjejas," katanya.